






31-2.4


lat

16





































BRIEFVE,
R E S P O N C E
D'VN CATHOLIQUE
FRANÇOIS, A L'APOLOGYE
ou deffence des ligueurs , &
perturbateurs du repos pu-
blic, se difant fauffement
Catholiques vnis les
vns avec les autres.



A Bordeaux.

M. D. LXXXVI.

RESPONSE

D.V.M. CATHOLIC

ST. LOUIS, MO.

Case

39

THE NEWBERRY
LIBRARY

326

15868

and his

and his



A. B. B. B.

M. D. LXXXVI

RESPONSE

D'VN CATHOLIQUE

*Francois, à l'apologie ou deffence des li-
gneurs, & perturbateurs du repos pu-
blicq. se disant fausement Catholiques
amis les vns avec les autres.*



My, ie croy que tu dis vray tu as perdu la patiēce aussi ne pouuois tu estre patient & ligueur tout ensemble, ton discours faict assez cō-
gnoistre que d'impatience tu es tombé en fureur, & de fureur en rage. Ce sont les degrez par lesquels il fault mōter à cette sainte ligue, & voila vn tresbeau progres pour prendre la deffence de nostre religion. Les impatiens veullent maintenir la mesme patience, les furieux la sagesse, les enragez la modestie. Je suis Catholique Apostolique & Romain, & aussi songneux de ma religion que tu pourrois estre, ie voudrois qu'il n'y en eust point d'autre en France. Mais ie suis contrainct de vouloir ce que ie puis, ne pouuant ce que ie veux: ie suis contrainct de desirer vn commencement de vne heureuse paix, ne voyant ne fin ne profit en cette guerre. Je suis la volonté de mon Roy, les prieres de mes compagnons. & desire avec eux

4

le reſtabliſſement de ceſt eſtat: le condamné & ay
en horreur ta Ligue qui en apporte la ruine. Je ne
ſçaurois recognoiſtre pour ſubjetz & ſeruiteurs
du Roy, ceux qui ont entrepris ſur ſa perſonne. Je
ne puis recongnoiſtre pour François ceux qui ont
le cœur en Eſpagne. Je louë la bonne volonté de
ceux qui s'opposent à voz deſſeins, qui ſe lient
pour vous deſſier, & qui s'vniffent pour vous de-
ſunir. L'approuue ce remede quoy qu'avec regret
pout les aigres douleurs qu'il aporte à ce pauvre
Eſtat. Que maudicte ſoit la Ligue qui nous faiſt
auoir recours aux Ligues. Maudites ſoyent les ar-
mes qui nous contraignent de prendre les armes.
Maudite ſoit l'eſperance qui reduit tant de pau-
ures ames au deſeſpoir. Amy res paſſions me paſ-
ſionnent, ton impatience eſbranle ma patience.
& ta fureur ma raiſon. Eſcoute ie te rédray com-
pte de ma paſſion. avec plus de fidelité que tu ne
fais de ton impatience. Il ne ſuffit pas pour ren-
dre vne action bonne, de ſe propoſer vne bonne
fin. Celuy qui coupe la gorge à ſon prochain, pour
donner l'aumosne à ſon prochain, ne laiſſe pas
pour ce deſſein d'eſtre m'eurtrier & Larron. La
Ligue qui trouble l'Eſtat, & qui le diuiſe, ne laiſ-
ſe pas d'eſtre à condamner quoy qu'elle ſe propo-
ſe la deſſence de la Religion. C'eſt vn beau tiltre,
mais c'eſt tout. C'eſt vn ſuperbe portail à vn ba-
ſtiment de terre, ie t'en veux faire voir l'eſtoſe &
voir à l'œil les maçons. Ceux de Guiſe en ont iet-
té le fondement, tu ſerois marry de les priuer de
c'eſt honneur. Mais ie te demande s'il leur eſt li-

5

cite de se liguier avec les ennemis de ce Royaume sans l'adueu de leur Roy? Je m'asseure que tu ne seras point si impudent qu'impatiēt, & que tu me cōfesseras qu'ils ont eu tort de se prédre à leur Roy estāt Roy Catholique, voire des pl^r religieux qu'il fust oncques. Voila donc le premier fondement de la Ligue, c'est vn crime de leze majesté plein de trahisō, plein d'audace, plein de mespris. Et voicy les crimes que ce crime nous à enfanté, voicy les beaux estages que vous auez basti sur ce beau fondement. La Ligue est faicte pour deffendre la Religion, & le commencement de cette deffence est vne generale entreprise sur les principales, & plus Catholiques ville de ce Royaume. Les Huguenotz estoient en Guienne, ceux de Guise dressoyent la teste de leur armée vers Paris, Les Heretiques viuoient à la Rochelle, ceux cy entreprenoyent sur Nantes, le presche se disoit à Mont-pellier, ceux cy le vouloient chasser de Marceille, La source de l'heresie estoit à Geneue, & ils la cherchoient à Lyon. Voyla le chemin qu'ils prenoient pour exterminer l'heresie. Je laisse les infinies cruantez qui se sont commises par ces nouveaux deffenseurs de la religion sur les Prestres mesme de nostre religion. Je me contrēte d'auoir le cœur de coucher en gros ce que i'aurois peine & horreur de te traicter par le menu. Toute la France sent assez le mal que la Ligue luy faict, sans qu'il faille que j'en rafraichisse la memoire par mon discours. Et bien dy moy à quel chef de la Ligue rapporterai tu l'entreprise

qui c'est faite sur les villes, & l'exécution qui s'est faite fut plusieurs autres. A quel chef rapporteras tu le nouveau & secret traité de Nancy, duquel le premier article est de se saisir de la personne du Roy s'il est possible? Tout Cela n'a nulle conformité avec le premier chef qui est selon ta diuision, qu'il n'y aye qu'une religion en France. encores moins le pourras tu rapporter à l'autre. Car à quel propos conspirer contre un Roy, & qui est Catholique, pour empêcher qu'un heretique ne soit Roy? Que ne laisse tu au Roy le soin de son Royaume? Penses-tu que sans ton aide Dieu n'aye pas le moyen de nous pourvoir d'un Roy Catholique, comme il a fait iusques icy? Nous auons dict tu un Roy plein de santé. Pourquoi d'ores enuies-tu sa bonne disposition? Tu espères qu'il enterrera & les uns & les autres: & pourquoi t'armes-tu pour estre à sa mort, si tu attends de luy une si heureuse vie? Certes tu ne pourrois mieux n'y plus viuement assaillir nostre religion Catholique, qu'en conspirant contre un Roy qui l'a si bien maintenue iusques icy. Tu ne conuertiras iamais un heretique par si mal-heureuse conspiration, tu ne conserueras iamais c'est Estat le diuisant. Tu ne tireras iamais une honne Paix d'une iniuste guerre. Ta bonne fin ne guerira iamais ton corrompu commencement. Ton beau pretexte ne couurira iamais estes mal heureux desseins. Ne tire point de ton costé la volonté du Roy, i'estois pres de luy quand la paix fut faite, le l'ay veu plover de le voir contrainct de hazarder son estat pour cō

seruer sa vie: Il me souuient encores du iour que la nouuelle vint de la deliurance de Marceille, le Roy veit les deputez de ladiète dās sa salle, il fendit aussi tost la presse & s'aprocha deux. Mes amis dit-il, ie vous accorde ce, que vous m'auiez demandé, & d'auantage sil est besoing, ma liberalité ne suffira iamais pour recognoistre vostre fidelité, Que dis-tu là dessus? Cest le Roy qui parle, il declare de sa bouche fidelles, ceux qui ont fait pendre vn de tes compagnons, as-tu point de peur? ou n'as-tu point de honte d'appeller saintement Ligués, ceux qu'on peut saintement lier à vn poteau?

Ie tourne de tous costés pour trouuer quelque chose de meilleur en ta Ligue, mais i'y pers mon temps, ie ny voy que mal, & ne voy point desperance qu'il doine sortir aucun bien de ces maux. Et pour le te faire cognoistre, ie suis content de respondre à ce beau argumēt sur lequel tu bastis, & ta Ligue & son Apologie. Tu dis que le Roy de Nauarre ne se doit point offencer de la Ligue s'il est Catholique, tu deuois dire s'il n'est François. Pourquoy ne s'en offencera-il pas veu qu'il le ruine vn estat auquel Dieu l'appelle pour successeur, & veu que le Roy s'en est offencé luy mesme? Qui veux-tu qui l'approuue, apres que le Roy la publiquement comdamné? Qui veux-tu qui la deffende apres que le Roy s'est armé contre elle? apres qu'il l'a assaillye, & qu'il s'est mis en deuoir de la vaincre, si son conseil eut secondé son courage, si ses Conseillers eussent esté

aussi fidelles a leur maistre, qu'il estoit fidelle à son Royaume? Les seruiteurs luy manquerent, & nō pas luy à ses seruiteurs la fortune le delaiſſa, & non pas la vertu. Et nous ſcauons combien encores auiourd'huy il deſire de recouurer ce que ces traitres luy ont fait perdre. Que puiſſe tu, ô mon Roy! remettre ton Royaume en paix, ta perſonne en ſeurete, & le ſeruice de DIEU en ſon entier. Je viens à l'autre point de ton argument, ſi le Roy de Nauarre renonce à la Religiō pour eſtre Roy de France, ceux de la ligue en doiuent eſtre grandement louēz. Mais qui penſes tu qu'il ſoit ſi ſor d'attribuer aux ligueurs vne ſi bonne oeuure, a eux dis-ie qui n'ont encores fait que mal? Pēſes tu que le coeur du Roy s'esbranle pour vne ſedition ou pour vne armée. Penſe tu que pour auoir pris deux ou trois cens Peſtiferez dans Caſtillon, le coeur du Roy de Nauarre ſe prince. Dieu tient le coeur des Roys, c'eſt luy ſeul qui les esbranle, & quand celuy là ſera esbranle nous en remercierōs Dieu qui l'aura touche, & non pas vous qui n'y pouues rien. Et quand Dieu nous auroit tant aſſigés, d'appeller à ſoy noſtre Roy, nous deuons tous ſouhaiter qu'il nous donne vn vrai Catholique, non pas vn hypocrite, vn qui ſoit tel pour ſauuer ſon ame & nō pas pour gaigner vn Royaume. Je dirai plus, & DIEU me vueille pardonner ſi ie faux, qu'il nous eſt plus expedient d'auoir vn bon huguenot pour Roy, & qui craigne Dieu qu'un mauuais Catholique. La force ne fera iamais vne bonne conſci-

ence: Les armes ne produisent que des renieurs de leur foy, & non pas des conuertis. Nous attendôs la conuersion de ce Prince de la grace de Dieu, & non pas de vos armes, non pas de vos trahisons, non pas de voz ligues, non pas de vos segrettes intelligêces. Et quel gré penses-tu qu'il vous scaura s'il vient iamais à la couronne, & que Dieu auroit exauce noz prieres en le conuertissant, quād au lieu d'un florissant Royaume, vous ferez contrainct de luy mettre en main, les cendres de ce pauvre estat? Tu dis que les Anges se resiouiront de sa conuersiō s'il est vray. Mais nous pleurerôs la subuersion de tant de bonnes villes qui perissent soubz voz armes, & serons encores si misérables de ne pouuoir viure le reste de noz iours que sur le tombeau de noz concitoyens.

Voicy le dernier point: c'est que si le Roy de Nauarre demeure ostiné, & que les François ne le vueillent point receuoir, les Catholiques doiuent remercier la Ligue, d'auoir esté cause que leur religion Catholique, n'aura point esté bannie de la France, voicy vn grand secret, d'où as-tu tiré que la religion Catholique doie ou puisse estre bannie de la France, sans la Ligue? Fais-tu l'estat de la vraye religion si miserable qu'il depende d'un si pauvre appuy? es-tu bien assuré que les François iugeront le Roy de Nauarre pour ostiné, & qu'ils ne le receuront point? Et s'ils le reçoient, quel profit aura apporté la Ligue en France? Dequoy aura seruyle sang & l'argent qui s'espend tous les iours de tant de bons François? Tu me confesse-

ras que le bien que tu attens de la ligue est incertain, pour ce qu'il depend d'une condition incertaine voye impossible à la ligue, & ie te confesse que le mal qu'elle faict est present & tres-certain.

Dequoy tert donc ta ligue? Parlons sans fard, vous voulez estre les plus fortz s'il mesadvient du Roy, vous voulés demeurer armés pour le desarmer vn iour sur le chemin du bois de Vincenne, si la commodité se presente, & quand la cōtinuation de voz meurtres vous aura donné assez de hardiesse pour commettre ce sacrilege, comme vous auez des-ia vne fois entrepris. Vous entreprenez la deffence de nostre religion, pour vous garder d'estre punis de vostre ambition: vous remettez au hazard du combat ce que vous pouuez esperer du droit de vostre cause: vous continuez à mal-faire, pour ce que vous auez mal commencé: Et voulés faire passer vostre iniuste entreprinse sous vn non moins iniuste poursuite. Tu dis que ce sont Calomnies qu'on propose contre ceux de Guise & pour leur deffence, tu dis que cette imputation n'est nouuelle. Il est vray: mais tant plus certaine en est elle, & toy criminel plus coupable de deffendre si fauement ce vieux crime. Tu falsifies la depositiō de Salce de pour iustifier leur cōiunctiō: Salcede ne mourut point cōme calōniateur, & s'il estoit mort pour ce respect, il le faudroit desenterrer pour luy donner vn honorable tōbeau, veu que les euenements font foy certaine de la verité de sa deposition.

Encores moins fais-tu pour la Ligue, de dire

qu'un Cardinal de Bourbon, en est Chef, si son entree la deffend, voicy la sortie qui luy fera son proces. Ce bon Prince se laissa au commencement emporter à la violence de ces Messieurs: Mais ayant bien tost apres recongneu qu'ils le faisoient instrument de leur ambition, qu'ils faisoient semblant de le vouloir establir pour ruiner la maison par elle mesme, il s'est aussi tost retiré, il a separé son zele de leur ambition, & à retiré sa foy de la confusion de ceste infidelité. Et tu voudrois encores attraper si tu trouuois ses ieunes Princes, les repaissant de la mesme esperance. Mais l'exemple de leur Oncle les fera sages, ilz recognoistront le venin de voz appastz, & voz bonnes fins ne les induiront point à se faire congnoistre à la France, par la ruine de la France: ils conserueront & leurs amys & leur reputation, pour s'opposer à voz mal-heureux desseins, soubz le commendement de leur Roy, quand Dieu luy fera la grace de vous pouuoir aussi librement contredire qu'il est violemment contrainct de vous complaire.

Voila maintenant ta ligue sans Cardinal, la voila sans chef, elle n'a plus que des membres pourris, ses plus belles actions sont crime de leze majesté, & voila tout le fruit qu'elle nous a apporté iusques icy: elle a mis la famine en France, & de la famine la peste, & l'une & l'autre sont cause de la mort de plus de deux cens mille personnes. Tu dis que c'est l'opiniastreté de ceux de la religion pretendue qui en est cause. Je te respons que vostre iniuste poursuite a iustifié leur deffect: qu'ils

vous ont avec droit refusé ce que sans raisõ vous demandiés d'eux, vous voulies retirer les villes que le Roy leur auoit donnees par la paix, & depuis encores accordees à l'assemblée de S. Germain, ils les tenoient pour leur seureté, vous les vouliez pour vostre aduentage, que n'attendies vous que celuy qui les auroit dõnees les redemãdast? Quel droit auez vous sur les villes de ce royaume? vous voulés que le Roy soit obey, & vous luy refusez toute obeissance. Pourquoi vous armez vous sans son cõmandemẽt. Pourquoi mesprisez vo⁹ son autorité? Pourquoi esperes vous plus de vostre force que de sa iustice? Pourquoi luy dressez vous vne guerre, quand il s'entretient en la paix? Tu dis que c'estoit pour ruiner les heretiques. Et il faisoit plus que vous, car il tachoit de sauuer ceux que vous voulies perdre, vous cõbattés les corps, & il vouloit auoir la victoire des ames, ses vœux, sa religiõ, son austere vie luy seruoient descadrons inuincibles pour s'asseurer en cette bataille: ses subiects ne le rainoient point par cette guerre, & il tiroit vn merueilleux contentement de cette paix. Mais elle ne vous pouuoit plaire, c'estoit la paix des hõmes, & non pas la paix de Dieu, aussi l'aués vous chassée, & en sa place vous auez mis la guerre du Diable, plustost cõme-tu dis, pour choisir vn Roy d'entre voz freres, que pour abbatre les austels des meschants: Vous auez perdu tant de temps pour obtenir le premier chef de vostre Ligue. Pourquoi poursuuez vous opiniaistrement avec nostre ruine ee

que vous mesmes, & de plus grâds que vous n'aués peu obtenir? Pourquoy voulés vous que la Ligue de quelques particulieres puisse faire, ce à quoy tout le Royaume à failly? Pourquoy nous promettôs nous plus d'heur des entreprinſes du Duc du Maine, que des belles & heureuſes executions de noſtre Roy? La Ligue n'a faiët iuſques icy qu'agaffer les Huguenots. Noſtre Roy les a vainc's, & toutesſois apres ſa victoire il leur à permis l'exercice de leur religiô, il leur à permis, diſ-je, pour ce qu'il ne le pouuoit oſter, & à mieux ayiné tenir ce corps en vie quoy qu'aucunement mal ſein, que de le tuer en s'opiniaſtrant à le guerir? Le Roy y a mis le fer, le tranchant à rebouché ſous ſa main, les cours de Parlement y ont mis le feu, la fumee nous à cuidé eſtouffer. Pourquoy n'aprenés vous à n'entreprendre plus, puis que ceux cy n'ont rien gaigné à leurs entreprinſes? Pourquoy vous arreſtés vous pluſtoſt à l'eſſay qu'à la preuue? Vous prenés vn plus haut deſſein, C'eſt d'empêcher que le Roy de Nauarre, ne vienne à la Couronne, vous vous eſtes ſeruis de Monſieur le Cardinal iāt que vous aués peu, pour l'en forclorre, vous aués ſouſtenu qu'il eſtoit plus proche. Depuis vous aués aprins que la branche ſuccede en France, pluſtoſt que les perſonnes, vous aués aprins que le Roy de Nauarre, n'a que faire de ſe ſeruir en droit de repréſentatiô, & qu'elle n'a point de lieu que lors qu'il y a concurrence: Que le Roy de Nauarre eſt premier, pour ce qu'il eſt Chef de la premiere branche, laquelle les loix

fondamentales, ont honoré par dessus les autres. Et quand il n'y auroit nulle Loy, la coustume qui a si bien maintenu le Royaume est loy assez forte. Aussi ne tenez vous plus ferme sur ce point, vous distes qu'il est heretique, & voulez qu'on vous enuoye, vous vous vantez de faire vn grand seruice à cest Estat quand le Roy viendrait à mourir, car c'est sur sa mort que vo' batissés vos trophées! Et pourquoy vous mettez vo' en peine auant le temps? Laissez voir le Roy. Pourquoy pressez vous les iours? N'avez vous point honte de vous presenter deuant luy pour attédre l'heure de sa mort? Je ne vous peuz regarder sans voir son Tóbeau, encores la memoire de la mort seroit agreable à luy qui faict exercice des'en souuenir, si avec la mort vous ne luy representés la misere de ses subiects, les cris des veufues, le desespoir des Orphelins, & en vn coup la desolatió de tout son Royaume. Vous ne parlez que de vaincre, & avez si grande peur d'estre vaincuz. Quand Dieu nous auroit tant affligez, de mener le Roy où vous l'attendés, que craignés vous que le Roy de Nauarre fasse comme il a faict en son pays? Je croy, & est vray semblable qu'il feroit en France, ce qu'il à faict en ses terres, il à trouué en Bearn l'exercice de la religion: par l'aduis commú des Estats, il t'a maintenu en son estat. Il à trouué en la basse Nauarre l'exercice de la religió Catholique Romaine, & il l'a maintenue aussi songneusement que la sienne, & quand il se trouueroit en France le Libre exercice des deux, il le maítiédroit.

Il n'est point estrange, il est François, nous le cō-
 gnoissons, & le recongnoissons pour Prince tres-
 prudent, & tres-sage: Ce qui nous le fait aymer,
 vous le fait hair: ce qui nous fait bien esperer
 de luy, vous le fait craindre. Il a des-jà appris que
 les armes ne peuuent rien sur la religiō: quelques
 certains hommes n'ont pas peu estre chassés de
 Frāce: par quelle raison voulés vous qu'ils le pro-
 pose? Et luy qui est Prince tres aduisé, de changer
 les meilleures villes, voire les Prouinces entieres
 de ce Royaume? Les François sont trop religieux
 pour changer de Religion, quand ils changent de
 Roy. L'exemple des ne fait point de Loy en Fran-
 ce, & puis que trouués vous en eux, pour nous es-
 pouuêter deuāt la peur? Ils se sont accordez en se-
 ble de leur religion, & ie voudrois q̄ nous eussions
 fait de mesme, à la charge de punir griefuement
 le premier qui s'oposeroit à la resolution d'un bō
 & sainct Concile. Je m'asseure que nous gaigne-
 rions plus par la raison que par la force, & qu'un
 iour conuertiroit plus de Huguenots, que plu-
 sieurs batailles & plusieurs anneés n'ont fait ius-
 ques icy. Nous les auons tant de fois condamnés,
 & ne les auons iamais ouys, que ne les conuain-
 quons-nous? Il nous est plus facile de les con-
 uaincre que de les vaincre, il est plus conuenable
 aux Chrestiens de gaigner les Chrestiens par la
 raison, que par la force. Nous auons perdu tant
 de sang, & vous en perdés encores d'auantage.
 Mais vostre faute est sans excuse pour estre fai-
 cte apres la nostre, & contre l'expresse volonté

gh.

du Roy. Ce vieux Romain : fist mourir son fils, pour auoir combatu sans son congé, quoy qu'il eust gaigné la victoire, & que meriteries vo^o, d'auoir tant perdu sans combattre? Il iugea plus expedient de n'auoir point de fils, que si la republique estoit sans discipline: Et tous les bons François iugeront plus vtile de n'auoir point de Ligue, que de troubler le repos de ce Royaume.

Mais tudis que c'est vn trouble nécessaire, pour ce que Dieu le commande, & que le Roy s'y est astrainct particulièrement par serment. Les passages que tu allegues sur ce propos, ne sont nullement à propos. Car pour destruire par ce commandement la religion pretéduë, il faudroit premieremét prouuer qu'elle est semblable à celle de laquelle Dieu vouloit la destructiō, & pour te faire entendre les passages desquels tu te fers, ie dis qu'il faut mettre difference, entre les religions ou entre les opinions sur la religion. Les vns destruisent entierement les fondemēs de nostre salut, & blasphemement contre Dieu: Les autres sont de telle nature qu'il seroit meilleur qu'elles ne fussent point: neantmoins elles ne sont point insupportables, & comme le Roy doit employer tous moyens pour oster les vns de son Royaume, aussi ne doit il pas vser de violence pour eriger autres. Tous Heretiques & toutes heresies ne sōt pas semblables, aussi la punition ou correction ne doit pas estre semblable. Les vns faillent par malice, les autres par ignorance ceux cy meritēt instruction, ceux là punition : Ceux cy doyuent estre

estre doucement admonestés, les autres peuuent estre rudement contraincts . Et pour donner exemple de ceste reigle, ie dis que celuy qui ne voudroit point recognoistre Dieu par sa parolle, ou qui ne recognoistroit point Christ. pour nostre mediateur: celuy qui nieroit sa mort ou sa resurrection: Ie dis que celuy ne doit estre nullement tolleré du Magistrat Chrestien: lequel neantmoins doit tascher diligemment d'abbatre plustost l'heresie que l'heretique: Où pour parler avec Monsieur Saint Augustin, il doit aimer les hommes, & faire mourir les erreurs: Mesme il les peut contraindre à faire la volonté de Dieu, cõtre leur volonté, & ou il recognoistroit vne extresme opiniastreté, vne malice, vn dessein de diuiser l'Eglise, ou de s'opposer à la verité, alors il luy est licite d'vser des remedes extremes, & de punir ceux là qui veullent ignorer ce qu'il faut qu'un Chrestien confesse necessairement pour son salut.

Voyla la Loy que le Magistrat doit obseruer contre ceux qui renuersent les fondemens de nostre salut. Mais, comme j'ay dit, il y a difference entre ceux là & ceux qui apportent en l'Eglise quelque opinion, de laquelle la cognoissance n'est point necessaire à nostre salut. Exẽple. Ceux de la Religion preterdue n'vsent point d'eau beniste en leurs assemblees, & n'ont point d'images en leurs Temples. C'este question s'il fault que les Chrestiens ayent de l'eau beniste, ou des images n'est point de leur salut, c'est vne question qui peut estre debattüe, de laquelle on peut s'enquerir, &

tu vois assez qu'estre Idolatre blasphemer contre Dieu, & n'vser point d'eau beniste ne sont pas choses semblables, l'un est crime, & l'autre est ignorâce. Dieu est deshonoré & l'Eglise se dissipe par l'un, elle ne laisse pas de s'entretenir pour l'autre. Pourquoy veux-tu punir d'une mesme Loy, ceux qui faillent si diuerſement? Voyons en quoy faillent ceux de la religion pretendue, & nous apprendrons comme il les fault traiter. Vuidons premierement ce point s'ils sont infideiles, & s'ils sont tels, ou changeons les, ou chassons les d'entre nous: Dieu le veult & le commande. Ils se disent membres de nostre Eglise: Ils sont ialous comme nous de l'honneur de Dieu. Ils l'adorent selon qu'ils apprennent, qu'il veult estre adoré par sa parolle. Il n'y à point en cela d'infidelité ny d'Idolatrie. Examinons maintenāt, s'ils sont heretiques, ie n'y voy point de malice: car quelle malice trouueras-tu à te faire brusler? à quitter leurs biens, & à se rendre pour leur religion. en ce monde miserables? Ie n'y voy point de opiniaſtrete, veu qu'is s'offrent à estre instruiſts. Noz maistres me pardonneront, si ie dis que ie ne voy point en eux les marques, par lesquelles ils m'apprennent congnoistre vn heretique. I'ay appris d'eux que l'heresie est *in habitu non in defectu*. Voyōs donc si ceux de là pretendue religion sont mal instruiſts, ou s'ils ne sont pas assez instruiſts. Nous ſcauons qu'ils croient en Dieu comme nous, qu'ils croient en vne diuine essence, trois personnes ou trois Hypostazes. Le Pere

le fils, & le saint Esprit, iusques là il n'y a poinct d'heresie. Ils tiennent deux Sacrements, le Baptisme & la Cene, & nous les tenons pour Sacremens. Il n'y à donc point d'heresie: Mais il faudroit leur apprendre d'en tenir encor' cinq. Ils croient que par le Baptisme, ils sont introduicts en l'Eglise, & que par la Cene ils y sont nourris. Ils croient que comme l'eau laue noz corps, qu'aussi le sang de Christ les ames. Ils croient que comme le pain, & vin nourrist le corps, que la chair de Christ nourrit les ames. Il n'y a point en cela d'heresie: Ils croient que comme ils recoiuent realement le pain, qu'ils recoiuent aussi realement le corps de Christ, duquel ils sont faictz mébres. Nous nous accordons avec eux en l'effect de la manducatiō de la chair de Christ. Mais nous disputons des instrumentz. Ils croient qu'ils le recoiuent par la foy & nous aussi. Mais voycy leur faute, c'est qu'ils croient de le receuoir spirituellemēt, & nous plus qu'eux corporellement. Ils le cherchent seulement au ciel, & nous croyons plus qu'eux, qu'il est, aussi apres la consecration en la main du Prestre. Aprenons leur à croire que Christ est sur l'autel, que le pain n'est point signe du corps, mais le corps mesme, & ils croient comme nous. Le defaut qui est en eux n'est point intolerable, ou nous auons tort de l'endurer auourd'huy parmy les Grecs que nous receuons comme membres de nostre Eglise. Chacun sçait qu'ils nennent qu'il ne se fault point enquerir si le pain est le corps, mais qu'il faut precisement faire ce que Christ à ordō-

né, qu'il faut faire son commandement, & non pas s'enquerir de sa volonté.

Si nous souffrons au grec ceste Ignorance, pourquoy en requérons nous la science en ceux cy? Vous pour le moins enuers eux de la mesme douceur que nos vieux Peres ont vsé à l'endroit des Heretiques conuaincus approuuant ce qui estoit de bon en leur opinion, & corrigeant ce qui estoit de mal par la verité. Suyuons encores les fonde-méts de leur salut. Ils croient le Symbole des Apostres, ilz croient que Christ est mort. Et que par sa mort il les a retirez de la mort à laquelle ils estoient asseruis par le peché de leur premier pere. Ils croient que pour aller en Paradis ils n'ont point affaire de autre purgatoire. Nous croyons que la Iustice de Christ efface nostre iniquité, q̄ sa mort nous dōne la vie, que par sa mort tous nos peches nous sont pardonnez. Et en cela nous sommes d'accord: apprenons leur que la coulpe du peché nous est remise: mais non pas la peine, & s'ils croient cela ils croyront comme nous. Ils croient a ce qui est contenu au viel & nouueau Testament: mais ils ne croient pas en tout & par tout aux traditiōs de l'Eglise. Ils ne croient pas donc mal ce qu'ils croient, Mais ils ne croient pas assez. Et pour le faire court il y a plustost en eux defect de bien, que habitude de mal. Je ne scaurois iusques icy condamner leur confession que ie ne condamne la nostre, de laquelle la leur est entierement tirée. Je scay bien qu'on les a bruslés comme Heretiques, & scay bien que les feux estoient allumés par toute la France, & que nos Presidens ne voyent pas clair

en leur Confession. J'ay veu plusieurs fois vn de leurs Iuges fondre en larmes, lors qu'il se souuenoit d'en auoir condamné au feu plusieurs, croiât qu'ils ne creussent pas de receuoir en la Cene reellement le Corps de Iesus Christ. Vne pauure Damoiselle qu'il condempnoit à mort, lui fist tellemēt sa leçon eu receuant sa sentence, qu'aussi tost il se retira de ces Iugements, passant le reste de sa vie avec beaucoup d'honneur, mais avec vne extreme repentance. Je ne le nommeray point. Les hommes vertueux le cognoissent sans le nommer, pour auoir esté en sa ieunesse le premier Iuriconsulte de sa robbe & sur ses vieux ans vn des plus grands Theologiens de ce Siecle. J'aymerois mieux en ce fait suivre la repentance de ce grand personnage que ses huguenots. Et puis qu'il n'y a point en eux d'heresie, ou s'il en y-a qu'elle n'est point de telle nature quelle peruertisse les fondemens de nostre salut. Il vaudroit mieux attendre de les instruire en nous conseruant, que nous opiniastrer sans raison à les ruiner en nous perdant. Considere ie te prie comme Dieu a benist & nos feux & nos supplices: voy comme il benist vostre liguë, vous vous la sentez ruyner de iour a autre. Et no^s nous sentons ruyner par elle. Dieu en a maudit le bastiments & les ruynes. Nous le voyons, nous le congnoissons, vn chacun le dit, vn chacun l'entend. Mais iusques icy personne n'en fait son prouffit. Nous sentons le mal, la douleur nous esueille, & nous ne veillons point pour y appliquer le remede. Je parle à vous ô Frâcoys! à quoy pensez vous.

Vn Edict de la Cour vous estõne, & les larmes du Roy ne vous esto ne point. Vous allez avec la Li-
gue pour vn commandement qu'il vous faict par
vn Secretaire, & ne reuenez pas chez vous pour
les prieres qu'il vous faict en son cœur. Vous n'a-
uez plus d'excuse: & seriez plus à blasmer, si la
grande faute de deux ou trois des grands ne ren-
doit la vostre moindre. Vous suiuez le Duc de
Ioyeuse: Mais vous & luy qui avez poursuiuy le
Marquis d'Albœuf & ses troupes, & qui laués fait
fayr honteusement: comment pouués vous cõ-
battre soubz mesme enseigne, mesler vostre sui-
te avec leur fuite, vostre gloire avec leur hôte, &
vostre hardiesse avec leur peur? Vous qui suiuez
le Marechal de Biron: vous souueñez vous plus
qu'il a faict l'enceinte de Paris, pour s'opposer aux
armes que vous fauorisez aujourd'huy? Vous sou-
uenez vous plus des Coutriers qui le firent ha-
ster pour se rendre pres du Roy, & luy ne se sou-
uient il point de ses bons conseils. Le son du Ta-
bourin, à il plus de pouuoir sur luy que la raison?
Luy qui a vñe saue pour ceste Courõne, l'a veult-
il perdre avec les ennemys de la Courõne? Le blas-
me plus les Gascons que tous autres, ils ont tou-
iours esté plus libres & poussez d'vn cœur gene-
reux, ont plustost suiuy la iustice q̃ les fautes. Je les
blasme de les voir aujourd'huy suiure le Mare-
chal de Mathignon, & à luy de se laïsser suiure à
eux, qui sçait bien le tort qu'il se faict, qui sçait
bien le tort qui leur faict & qui deuroit
plustost mourir, que d'enterrer dans le fossé de Ca-

stillon l'honneur qu'il auoit aquis dedans Agen. Confessez librement tant que vous estes que vous n'avez point eu de iugement, ou que vous n'avez plus de constance. Confessez que vous avez esté traistres par le passé, ou que vous n'estes plus auiourd'huy fidelle à la Couronne. Voz enfans vous redemanderont l'honneur que vos Peres vous ont l'aissé. La France se plaindra de vous, & vous redemandera les François qui se pendent sous vos commandemens: vos consciences vous conuaincront du peu de conscience que vous faictes de cōbattre contre vos consciences.

Vniſſés vous donc, rengés vous pres du Roy, dōnons luy la force, & qu'il repraigne son autorité, qu'il ordonne, que nous obeissions. Qu'attendés vous en priant. Aymés-vous mieux perir, séparés & des-vnis, & vous confirmer estans ensemble. Conserués vous, conserués nous: qu'on coure sus aux rebelles & qu'on espargne les obeissans. Oſtons à ce coup la cause ou le pretexte qui nous esblouit les yeux, vniſſons nous pour demander & obtenir vne sainte reformation de religion qui mette nos ames en repos & qui coupe à l'aduenir le chemin aux troubles. Nous congnoiſtrons par ce seul moyen ceux qui seront poussés d'une bonne affection, les gens de bien nous aideront: ceux qui ont quelque religion nous suyront: ceux que nous appellons heretiques y consentiront: Et ceux qui s'opposeroient à ce qu'est Conseil, doiuent estre tenus pour ennemis de Dieu & des hommes. Qu'on ne m'allegue plus

que le Concille en est passé, les actions bonnes ne
 fussent pas d'estre bonnes pour estre reiterees
 s'il n'y a commandement de Dieu contraire.
 Le Concille ne pert rien de sa dignité, pour
 estre conuoqué plusieurs fois. Constantin
 le rassembla pour Arriua. Nostre Roy n'a
 point moindre authorité ou deuotion que Con-
 stantin, & les Huguenots, ne sont pas pires que
 les Arriens. Fault il sous pretexte que l'Italie ou
 l'Espagne n'en ont point de besoin que nous en
 soyons priués? Ceux qui sont à leur aise ne con-
 seillent iamais bien ceux qui sont en peine. Si le
 mal leur couptoit autant qu'à nous, ils raba-
 troient de leur auctorité, & aymeroient beau-
 coup mieux consentir aujourdhuy à vne refor-
 mation de religion veu mesmement qu'elle est
 tost où tard necessaire que de se prédre avec tous
 les religieux. Nous nous perdons & sommes mi-
 serables toute nostre vie, pour ne vouloir estre vn
 iour heureux. Le iour que nous nous ioindrons
 pour ceste belle entreprinse, ce iour sera le com-
 mencement de nostre heur, & la fin de nostre mi-
 sere. Nous le pouuons, vous le deués, la raison
 nous le conseille, le temps nous presse, la neces-
 sité nous y contraint. Faisons par sagesse de bonne
 heure ce que nous ne pouuons pas faire dans
 quelque temps par nostre folie. Les ennemis de
 cest estat se rallient, & nous les regardons faire.
 Ils complottent vostre mort & vous leur appor-
 tez vostre vie. Ils pouruiuent les Huguenots pour
 nous deffaire apres nous auoir passez à la pour-
 suite

suir, faisons prouffit de leur dessein, & n'attendons pas le dernier effect de leur malice.


Ie reuiens à toy. Comment prouueras tu maintenant que le Roy doit poursuiure à feu & à sang ces pauures gés? Tu entens des-jà qu'il n'y a point de raison d'alleguer le commandement de Dieu. Au septiesme du Deut, il cōmande d'abbatre les Autels des Idolatres Tu scais essez qu'il n'y a en eux ny infidelité ny Idolatrie: Et s'il s'en trouuoit ie m'accorderois avec luy ou plustost avec l'esprit de Dieu.

Quand à l'autre passage du dixseptiesme où il est commandé au peuple de prendre vn Roy entre les freres. Il est allegué aussi mal à popos que le precedant. C'est vn commandement que regarde particulièrement ce peuple duquel le Royaume estoit seulemēt de nostre Seigneur: Et n'estoit pas raison qu'il tōbast en la main d'vn estranger & d'vn infidele. Ceste consideration ne peut estre au Royaume de Frâce. Et ce tiltre ne peut estre donné au Roy de Nauarre qui est le premier Prince du sãg, Prince creignant Dieu: Prince religieux, & du quel la Ligue creint plus & le courage & la iustice que elle ne hait la Religion.

Que reste il plus? Tu dis que le Roy s'est obligé à son sacré de maintenir sa religiō. Ie l'accorde qu'il le doit faire: mais maintenir sa religion n'est pas croire sus à toutes les autres. Si tu veux qu'il soit obligé à rayner les Idoltres, il faudroit qu'il passast en Leuant, qu'il deliurast la Terre Saincte de la tyrannie des infideles: Et ie croy que ce passage vous seroit aussi agreable, que sa demeure vous

est ennuyeuse; Ne te semble il pas qu'il s'acquitte assez & de sa promesse & de son deuoir mettant de bons Euesques & de bós Pasteurs aux Eglises? Pense-tu qu'il ne face pas mieùx de mettre toute peine à faire bié instruire ses sujectz, que de pourfuyre à mort ceux qui se trouuerót mal instruits? Ne pense-tu pas que l'exemple qui donne à tous bons religieux est vrayement maintenir sa Religion? Ouy tu le penses: tu crois assez ce que ie me traualle de te faire croire: mais tu nous veux deguysér les passions sous le masque d'un vray Zele, Tu fais semblât de veiller pour l'Eglise pour pouoir vn iour dormir sur l'estat, & Dieu leuera ce masque d'hypocrysie. D I E V confondra tes conseils, D I E V dissipera voz desseins: & quand il aura ietté son œil de pitié sur nous, il vous iettera dás le feu côme Fleaux de ton ire & desquelz il nous chastie iustement pour noz pechez.

*Et ego Credo Ecclesiam Catholicam
Sanctorum Communionem.*



for - on .

